

SESION EXTRAORDINARIA CELEBRADA POLO PLENO DO CONCELLO

O DIA 27 / AGOSTO / 1.996

S U M A R I O

ASUNTO UNICO: MOCION DE CENSURA O ALCALDE DO CONCELLO DE REDONDELA, PROPOÑENDO COMO CANDIDATO A CI-TADA ALCALDIA A D. AMADO RICON VIRULEGIO.

No Auditorio "JOSE FIGUEROA" de Redondela, sendo as vinte trinta horas do día vinteseite de Agosto de 1996, baixo a Presidencia do Ilmo. Sr. Alcalde, D. XAIME REI BARREIRO, e a asistencia dos Sres./as Concelleiros/as: D. MANUEL ALONSO LEMOS, D^a. M^a DEL CARMEN BASTOS RODRIGUEZ, D. JOSE BLANCO PUGA, D^a. FRANCISCA CANAL GOMEZ, D. JAIME DARRIBA VILAS, D. GUMERSINDO FERNANDEZ MENDEZ, D. EMILIO GONZALEZ IGLESIAS, D. XOSE LUIS GRANDE GRANDE, D. MANUEL IGLESIAS CARRERA, D. LUIS ALBERTO MIGUEZ DOCAMPO, D. LUIS ALBERTO ORGE MIGUEZ, D. XOSE CARLOS PAZOS DOCAMPO, D^a. CECILIA PEREZ ORGE, D. MANUEL PIÑEIRO COSTAS, D. FRANCISCO PUCH CASAL, D. AMADO RICON VIRULEGIO, D. LUIS RODRIGUEZ VILARCHAN, D. JOSE MANUEL SOTO VIRULEGIO, D. JAIME TORNERO LOPEZ, e D^a. JOSEFA VILLAYERDE RODRIGUEZ, actuando como Secretario que certifica, D. LUIS TORRADO VAZQUEZ, se constitue o Pleno do Ilmo. Concello en sesión extraordinaria correspondente ó día da data, conforme á convocatoria e de acordo co Orde do Día remitida a tódolos Sres./as. Concelleiros/as, coa antelación legalmente requerida.

Está tamén presente o Sr. Interventor, D. MODESTO SOLLA SANZ.

A Presidencia delcara aberta a sesión en primeira convocatoria, procedéndose a trata-lo único punto da Orde do Día.

Serie A N.º 0361175

**ASUNTO UNICO.- MOCION DE CENSURA O ALCALDE DO
CONCELLO DE REDONDELA, PROPOÑENDO COMO CANDIDATO A CITADA
ALCALDIA A D. AMADO RICON VIRULEGIO.-**

Polo Sr. Alcalde-Presidente dase conta de Moción de Censura de data 9 de Agosto do ano que andamos, asinada por D. Amado Ricón Virulegio, D^a. M^a del Carmen Bastos Rodríguez, D. José Manuel Soto Virulegio, D. Manuel Piñeiro Costas, D. Luis Rodríguez Vilarchán, D. Luis Alberto Míguez Docampo, D. Jaime Darriba Vilas, D^a. Francisca Canal Gómez, D. Gumersindo Fernández Méndez, D. Manuel Alonso Lemos, e D. Francisco Puch Casal, na que expoñen que ó amparo dos artigos 107 e 108 do RD. 2568/86, do 28 de Novembro, polo que se aproba o Regulamento de Organización, Funcionamento e Réxime Xurídico das Entidades Locais, en relación co Artigo 197 da Lei Orgánica 5/85, do 19 de Xuño, de Réxime Electoral Xeral, e solicitando a convocatoria de sesión extraordinaria do Pleno do Concello para tratar do seguinte e único asunto na Orde do Día: Moción de Censura ó Alcalde do Concello de Redondela propoñendo como candidato á citada Alcaldía a D. Amado Ricón Virulegio.

Polo Sr. Presidente concédese a palabra ó Concelleiro Sr. Ricón Virulegio, quen da as gracias ó Sr. Alcalde Presidente, Concelleiros e veciños do Concello, sinalando que esta tarde resulta ser un momento importante e necesario, afirmando que foi o PP que obtivo maioría de votos nas últimas eleccións municipais. Continúa a súa intervención decindo que esta data é esencial xa que en virtude de principios constitucionais e segundo o disposto no Artigo 197 da Lei Electoral ó que da lectura, utilizamos este mecanismo tan democrático coma o dunhas eleccións ou dun pacto de gobernabilidade cun partido político para evita-la ingobernabilidade e pola nula xestión do actual grupo de goberno.

Continúa a súa intervención o citado Sr. Concelleiro dicindo que foi o PP o que gañou as últimas eleccións municipais con máis de cinco puntos de ventaxa sobre o PSdeG-PSOE, afirmando que esta Moción é lexítima e constitucional, pola total paralización do Concello, gobernado por un partido que na actualidade conta con só sete Concelleiros dos vinteún que integran a Corporación.

Na súa intervención o Concelleiro Sr. Ricón Virulegio, indica que nun principio pensouse que o PSdeG-PSOE gobernase con axuda dunha coalición, pero iso non foi posible por non renunciar o actual Alcalde, Xaime Rei Barreiro, e a súa dona, que eran condicións impostas polos nacionalistas para entrar na coalición necesaria, dando lugar a negativa da coalición por parte do BNG á dimisión de dous dos seus Concelleiros e, consecuencia da ingobernabilidade do PSOE provocou a dimisión do seu Concelleiro Sr. Puch Casal, e o seu pase ó Grupo Mixto.

Seguindo na súa intervención o Sr. Ricón Virulegio califica ó Sr. Alcalde Sr. Rei Barreiro de levar a cabo unha política absolutista, con falta de transparencia e carente de ética política. Así mesmo tacha de soberbio ó Sr. Alcalde Sr. Rei Barreiro e a súa dona dicindo que practicaron unha política de amiguismo, indicando, que a soberbia xa non é de agora, xa que provocou que persoas de grande valía abandonaran o seu Grupo Político, afirmando que a incapacidade do goberno do Alcalde Sr. Rei Barreiro, non é cousa nova, xa que manexou máis de dezaseis mil millóns de pesetas nos dezasete anos do seu goberno sen que resultasen beneficios para os veciños deste Concello, e así as obras da depuradora, centro de saúde, colexios, etc., foron feitas por outras Administracións Públicas e non con diñeiro do Concello.

Continúa na súa intervención o Sr. Concelleiro antes citado, sinalando que ata esta data aínda non se aprobaron os Orzamentos Municipais, denunciando a nula actuación do Grupo de Goberno e que todo o anteriormente exposto xustifica a presente Moción de Censura.

Posteriormente o Sr. Concelleiro antes citado, indica que a débeda deste Concello hoxe supera os mil cincocentos millóns de pesetas, dos que máis de douscentos non están contabilizados e que na súa etapa de Senador das Cortes do Estado, non conseguiu ningún beneficio para este Concello, tendo o mesmo menos servicios que outros Concellos máis pequenos.

Remata a súa intervención o Concelleiro Sr. Ricón Virulegio, dicindo que si cando o PSdeG-PSOE perdeu as Eleccións Municipais en 1995, encabezase unha oposición digna, non tería que pasar agora por esta Moción de Censura.

Polo Sr. Alcalde-Presidente Sr. Rei Barreiro, díselles ó Concelleiro Sr. Ricón Virulegio que como consello cese o seu asesor, xa que só acaba de dicir obviedades. Continúa dicindo o Presidente Sr. Rei Barreiro que ninguén discute a legalidade da presente Moción de Censura, pero outra cousa é a ética e a moral da mesma, non considerando lexítima a referida Moción, xa que se fai cun traidor que vende a todo un electorado progresista.

Serie A N.º 0361176

Continúa o Sr. Presidente no seu uso da palabra dicindo que ninguén dudou que o PP gañou as eleccións municipais, coa axuda da Televisión Galega e de Xesús Pérez Varela, pero o Sr. Ricón Virulegio ignora que as eleccións municipais foron eleccións a Concelleiros como as do Parlamento o son para eleccións de deputados.

Afirma o Sr. Presidente do Concello no seu uso da palabra, que os votos do BNG déronlle a Alcaldía deste Concello de forma democrática ó Concelleiro Sr. Rei Barreiro, como lle pasou a Aznar cos votos de CIU no Parlamento do Estado; pero este é dende logo o xogo dos pactos. Afirma o Sr. Presidente que a elección do Sr. Alcalde neste Concello foi tan democrática como o triunfo do PP nas Eleccións Municipais, e que si o BNG non quixo pactar no seu momento unha coalición co PSdeG-PSOE non pasa nada, atopándose este grupo de goberno nunha situación semellante á do Sr. Aznar con respecto ó Sr. Pullol, xa que iso permite facer pactos puntuais, considerando que o PP coa compra dun concelleiro rompeu o equilibrio político e califica de burda a operación do PP, xa que debeu de provocarse antes a ingobernabilidade.

Continúa na súa intervención o Sr. Presidente dirixíndose ó Sr. Ricón Virulegio para decirlle que non ten autoridade moral Vde. e o seu partido para calificalo como carente de falta de ética e moral, e neste senso pregúnteselle á TVG, e ós Concellos de Nigrán, Porriño, Vigo e outros do PP, que clase de ética teñen, pero o Sr. Ricón Virulegio acúsame de falta de ética e resulta que me compra a un Concelleiro meu, e que tampouco se lle pode acusar ó que fala de amiguismo e clientelismo. Continuando na súa intervención o Sr. Presidente afirma que os Presidentes das Deputacións son os que sen dúbida fan uso dun clientelismo pola utilización que fan os mesmos da maquinaria e os cheques que expiden, a pesar do seu recoñecemento que ten o que fala ó Sr. Abeledo, Presidente da Deputación Provincial de Pontevedra.

Continúa a súa intervención o Sr. Presidente afirmando que cando o Sr. Ricón Virulegio presumía de home de esquerdas, o mesmo falaba maravillas, tanto del como da súa dona Fita Villaverde, a que calificara como persoa activa e que agora mesmo a vilipéndia, non importándolle ó mesmo, porque non ten catadura moral, e así seis meses antes falaba mal de Fraga Iribarne, e iso en política chámase folibusterismo político.

Remata a súa intervención o Sr. Alcalde-Presidente dicindo que está orgulloso das actuacións da Xunta de Galicia en Redondela polo que respeta ó Centro de Saúde, os Institutos, etc., sendo só obriga dos Concellos a aportación dos terros necesarios para tales finalidades, calificando de aberración política do concelleiro Sr. Ricón Virulegio, a opinión do mesmo sobre esta tema.

Concedida a palabra pola Presidencia ó Concelleiro SR. ALONSO LEMOS, por este pregúntase si é lexítimo ou non un cambio de goberno en Redondela, e dí que o Sr. Rei Barreiro, actual Alcalde, utilizou as siglas no seu interese e non para impartir democracia. Dí que trátase de mirar a necesidade ou non de facer un cambio, e que el que se califica como home de esquerdas se pregunta como moitos dos veciños porque se marcharon tantos membros do PSdeG-PSOE, citando ó respecto os nomes de anteriores Concelleiros, como dos Sres. Couñago Laxe, Docampo, Salomón, Puch Casal, a Sra. Pena, e o mesmo que fala.

Continúa a súa intervención o Concelleiro Sr. Alonso Lemos referíndose ó Secretario do actual Sr. Alcalde, recriminando ó mesmo polo tratamento dado a moitos cidadáns contrario ó auténtico espírito socialista. Pero paulatinamente ese espírito foi deteriorándose e se foi fraguando un Concello, o de Redondela, como dunha familia que non defendeu os intereses dos veciños, onde non se fixo nada, cunha nefasta xestión urbanística e cunha política totalmente negativa.

Remata a súa intervención o Concelleiro Sr. Alonso Lemos dicindo que como independente confía na xestión deste novo equipo de goberno, que hoxe vaise formar aquí. E que sen dúbida os berros de agora contra os mesmos, dentro dun ano, vanse tornar en aplausos.

Concedida a palabra pola Presidencia ó Concelleiro SR. PAZOS DOCAMPO, por este maniféstase que os que presentan a Moción de Censura deberían sinalar as deficiencias do actual equipo de goberno, o que non se fixo, como tampouco se expuxo polos que fan a moción de censura un programa de actuación como futuro equipo de goberno, e con referencia ó PP indícaselle que no Concello non se lexisla, senón que se goberna.

Continúa a súa intervención o Sr. Concelleiro antes citado, dicindo en relación coa posible coalición que poido haber entre o seu partido o BNG e o PSdeG-PSOE, que o que pensan o BNG neste senso é competencia exclusiva do citado partido político, e non do PP, e que polo tanto o mesmo non pode atribuírse tal competencia.

Na súa intervención o Concelleiro Sr. Pazos Docampo, dí que o PP non ofrece un programa de actuación, e que polo tanto non se pode saber si a actuación vai a ser boa ou mala, e que esta Moción é consecuencia da política do PP que pretende ocupar tódolos Concellos de Galicia coa intención de acaparar o máximo poder posible. Considera o Sr. Concelleiro no uso da palabra, que tanto os Concelleiros Sres. Puch Casal como Alonso Lemos, son dúas persoas que están no mercado da política, e dí que o PP co primeiro crea o tráfuga e logo compra ó mesmo;

Serie A N.º 0361177

afirmando que ó Concelleiro Sr. Alonso Lemos se lle satisface a ansia do poder, e polo que se refire ó Concelleiro Sr. Puch Casal, para o mesmo tense prevista unha compensación económica. Seguindo na súa intervención o Concelleiro antes citado, fala así mesmo dos casos de Ourense ou de Maceda, e que os precios en cada caso son distintos. En Redondela parte do precio da citada moción de censura consiste nunha compensación urbanística, valéndolle ó PP calquera tipo de persoas, xa sexan do PSdeG-PSOE ou Independentes, calificando ó PP de ter unha dobre moral e linguaxe.

Continúa dicindo o Concelleiro Sr. Pazos Docampo que o PP xustifica a Moción de Censura en base a un desgoberno que non xustifica, mentras que o PP dende que tomou posesión só presentou unha moción que era as de indemnizacións ós Concelleiros, e que así mesmo nas Comisións Informativas para aproba-lo Orzamento, o único que fixo propostas foi o BNG, afirmando que si non se presentan Mocións indudablemente é que se está de acordo coa actuación do PSdeG-PSOE gobernante no Concello de Redondela, ou noutro caso, o PP non ten alternativas.

Así mesmo dí o Sr. Voceiro do BNG no uso da palabra, que polo que respecta ás privatizacións o PP coincide coa política seguida neste Concello polo PSdeG-PSOE e pon como exemplo o caso do aparcamento, sinalando que aquí o que se trata é de chegar ó goberno deste Concello, considerando que o PP non está lexitimado para presentar esta Moción de Censura.

Remata a súa intervención, afirmando que as Deputacións Provinciais utilizan os diñeiros que son de todos os cidadáns, servindo só para comprar votos, avogando pola desaparición das mesmas e sinalando que vai a votar en contra desta Moción de Censura.

Concedida a palabra pola Presidencia ó Concelleiro Sr. GONZALEZ IGLESIAS, por este dí que pensaba que se ian a confrontar programas de goberno diferentes, pero que a realidade é que os censurados non critican o que se fixo mal no Concello polo actual equipo de goberno, nin tampouco ofrecen programas alternativos; que, o que se quere, e sentarse no sillón da Alcaldía, e nos non queremos manter ese sillón a calquer precio, dicindo que o PP non ten dignidade política.

Polo Concelleiro Sr. González Iglesias criticase ó Concelleiro Sr. Alonso Lemos, que votou tres plans de urbanismo e nun abstívose, non asistindo ás Comisións de Urbanismo, non sabendo con esa actitude como se califica de desfeitos a actuación do grupo de goberno, non coñecendo así mesmo a ningún de esquerdas que se sentase debaixo da foto do Sr. Fraga Iribarne como el fixo.

Continúa a súa intervención o Concelleiro Sr. González Iglesias, sinalando que dísolle ós Concelleiros Sr. Alonso Lemos e Puch Casal que puxeran sobre a mesa as súas declaracións sobre a renda como el fixo, pero que non apareceron as declaracións dos mesmos, indicando que as acusacións se solventarán no Xulgado e que un home de esquerdas como el é, estaría gustoso de saír dun goberno como consecuencia da Moción de Censura coa participación dun traidor e dun especulador.

Na súa intervención o Concelleiro Sr. González Iglesias dí que o Sr. Ricón Virulegio afirmaba na súa campaña electoral que Redondela ía a sonar, e que indudablemente Redondela sona por un traidor, un tráfuga e unha persoa que compra vontades.

Así mesmo o Concelleiro Sr. González Iglesias afirma que o Sr. Ricón Virulegio minte xa que non houbo no PSdeG-PSOE tales fisuras, só unha pola compra do Sr. Ricón Virulegio, dicindo que veremos que orzamentos se presentan polo PP para a súa aprobación, e que por outro lado o 99 % dos asuntos do Pleno, ata agora aprobáronse cos votos do PSdeG-PSOE e do PP, sendo iso unha proba de que non houbo tal desgoberno ó que alude o Sr. Ricón Virulegio, ó que califica de cobarde político por negarse a un debate co actual Alcalde Sr. Rei Barreiro e por que vai a saír Alcalde a hombros dun traidor.

Concedida a palabra pola Presidencia ó Concelleiro Sr. Ricón Virulegio, por este referíndose ó BNG, dí que pasa deles radicalmente e con respecto ó PSdeG-PSOE, dílle ó grupo de goberno que a situación económica do Concello é desastrosa como pode xustificar a Intervención pola falta de tesourería e califica a política do Sr. Alcalde como de nefasta.

Polo Sr. Presidente maniféstase que o Sr. Ricón Virulegio non é contrincante político e a continuación fai unha relación de obras referíndose á inversión feita por este Concello, como asfaltado de rúas por importe de 1.500 millóns de pesetas, mellora do tráfico urbano e o alcantarillado valorado en oitenta millóns de pesetas, aproximadamente, nun ano de goberno de difícil gobernabilidade, considerando a Moción de censura de vergonzosa e que incluso algúns líderes e militantes da dereita non se atreven a defendela. Remata a súa intervención o Sr. Presidente calificando ó Concelleiro Sr. Ricón Virulegio de vacío e incompetente.

Concedida a palabra pola Presidencia ó Concelleiro Sr. Alonso Lemos, e dirixíndose ó Concelleiro Sr. Pazos Docampo, pídelles ó mesmo a dirección da súa academia para poder ir a ela, e dirixíndose ó Concelleiro Sr. González Iglesias, maniféstalle que non vive como el da política, senón do seu traballo o que supón que existe entre ambos unha gran diferenza.

Serie A N.º 0361178

Continúa a súa intervención o Concelleiro Sr. Alonso Lemos, sinalando que o mesmo fundou un partido político sin apoiarse en siglas políticas, indicando por outro lado que si ben votou favorablemente as normas subsidiarias, o Sr. González Iglesias modificou esas normas.

Remata a súa intervención o Concelleiro Sr. Alonso Lemos, dicindo que xamais poñeráse ó lado do concelleiro Sr. González Iglesias, pero que si se porá do lado do Sr. Fraga Iribarne, dicindo por tres veces consecutivas e con énfasis o nome do citado político.

Concedida a palabra pola Presidencia ó Concelleiro Sr. Pazos Docampo, por este maniféstase que este debate non dá para ter unha segunda intervención xa que na Moción de censura non se presentou ningún programa de goberno.

Continúa a súa intervención o citado Sr. Concelleiro dicindo que o Concelleiro Sr. Alonso Lemos ten problemas de números polas declaracións feitas polo mesmo á prensa, precisando que o citado Sr. Concelleiro non sabe diferenciar un plan PXOU dun Plan especial de urbanismo, e que non hai constancias nas actas dos plenos de que o PP se opuxera á política do PSdeG-PSOE, relativa a gastos de ceas dos Viaductos, así como á festa do "Choco", e remata a súa intervención reiterando o seu voto en contra da Moción de censura, pola utilización de tráfugas para conseguilo poder.

Non habendo unanimidade de criterios, polo Sr. Presidente sométese a votación a presente Moción de Censura.

Efectuada esta, obtívose o seguinte resultado: Votan a favor da citada Moción de Censura, os señores Concelleiros do PP (9), e os Concelleiros Sres. Alonso Lemos e Puch Casal; Votan en contra da mesma, os Sres. Concelleiros do PSdeG-PSOE (7) e os Sres. Concelleiros do BNG (3). Na súa consecuencia e por maioría absoluta de votos, como consecuencia da aprobación da Moción de Censura, resultou proclamado Alcalde-Presidente do Ilmo. Concello de Redondela, o proposto na referida Moción, o Sr. Concelleiro, D. AMADO RICON VIRULEGIO.


Seguidamente polo Sr. Secretario Xeral deste Concello, se lle tomou xuramento ó Concelleiro Sr. Ricón

Virulegio, proclamado neste acto Alcalde-Presidente do Concello de Redondela, segundo a fórmula establecida no RD. 707/79, que dí: "Xuro ou prometo pola miña conciencia e honor cumprir fielmente as obrigas do cargo de Alcalde, con lealtade ó Rei, e gardar e facer garda-la Constitución como norma fundamental do Estado", contestando o Sr. Ricón Virulegio, proclamado Alcalde-Presidente deste Concello neste acto, "SI XURO".

E, non sendo outro o obxecto desta sesión, pola Presidencia levántase a mesma, sendo as vintedúas horas e vinte minutos da data fixada no encabezamento, en proba de todo o que, se estende a presente Acta, que se inscribiu no Libro dende a volta do folio 172 do Papel Timbrado da Comunidade Autónoma de Galicia, Serie A nº 0361174, ata a volta do folio 176, Serie A nº 0361178, de todo o que, como Secretario, DOU FE.-

O ALCALDE

O SECRETARIO



AMADO RICON VIRULEGIO

LUIS TORRADO VAZQUEZ